



**BOSNA I HERCEGOVINA  
FEDERACIJA BOSNE I HERCEGOVINE  
ZENIČKO-DOBOJSKI KANTON  
OPĆINA TEŠANJ  
OPĆINSKO VIJEĆE**

Broj: 01 \_\_\_\_\_/16  
Datum: \_\_\_\_\_ 2016. godine

**NACRT**

Na osnovu člana 7. i 14. Statuta Općine Tešanj ("Službeni glasnik Općine Tešanj" 11/07), Općinsko vijeće Općine Tešanj na sjednici održanoj dana \_\_\_\_\_, donosi

**ODLUKU  
O GRBU I ZASTAVI OPĆINE TEŠANJ**

**I - OPĆE ODREDBE**

**Član 1.**

Ovom Odlukom utvrđuju se izgled grba i zastave Općine Tešanj (u daljem tekstu: Općina), način i uvjeti upotrebe grba i zastave.

**Član 2.**

Grbom i zastavom Općine predstavlja se Općina i izražava pripadnost Općini.

**II - IZGLED GRBA I ZASTAVE OPĆINE TEŠANJ**

**Član 3.**

Grb je karakterističnog štitastog oblika sa gornjom blago zaobljenom stranom i donjim izduženim dijelom ovalne forme, koji se završava u za grbove karakterističnom šiljku. Podloga grba je žute boje. U gornjem dijelu grba nalazi se zelena površina sa obrisima Starog grada, Sahat-kule i munare. Predstavljeni detalji simboliziraju kulturno naslijeđe općine Tešanj i vertikale koje vizuelno dominiraju uz Stari grad.

U donjem dijelu grba koji je zelene boje nalazi se knjiga bijele boje koja simbolizira znanje. Dijelovi su spojeni žutom linijom koja simbolizira rijeku Usoru, Tešanjku i druge vodne resurse. Okvir grba je crne boje.

**Član 4.**

Izgled i grafičko rješenje grba predviđeni su Grafičkom knjigom standarda Općine.

**Član 5.**

Zastava je pravougaonog oblika, bijele boje sa grbom Općine na sredini zastave.

Standardna veličina zastave je metar visine i dva metra dužine, a može se izrađivati u različitim veličinama, s tim što je odnos visine i dužine 1:2.

Veličina grba na standardnoj zastavi je 0,61 metar visine i 0,54 metar širine i može se mijenjati u zavisnosti od veličine zastave, s tim da veličina grba mora biti proporcionalna u odnosu na veličinu zastave.

Ispod grba Općine na zastavi može biti ispisan natpis "Općina Tešanj".

Zastava se može postavljati u horizontalnom i vertikalnom položaju zavisno od potrebe.

### **III – UPOTREBA GRBA I ZASTAVE**

#### **Član 6.**

Grb Općine upotrebljava se u skladu sa odredbama ove Odluke, u svrhe i na način kojima se ističe ugled i dostojanstvo Općine, i to:

- na aktima, dopisima, elektronskoj i drugoj komunikaciji Općinskog vijeća, Općinskog načelnika, Općinskog pravobranilaštva, općinskih službi i drugih ovlaštenih lica koja istupaju u ime Općine;
- u službenim prostorijama Općinskog vijeća, Općinskog načelnika i Općinskog pravobranioca;
- na priznanjima i pečatima Općine;
- na informativnim i promotivnim materijalima Općine;
- u službenim prostorijama javnih ustanova i preduzeća kojima je osnivač Općina;
- u službenim prostorijama i pečatima mjesnih zajednica;
- prilikom označavanja određene imovine Općine.

#### **Član 7.**

Zastava Općine ističe se:

- na zgradi ili ispred zgrade u kojoj je sjedište Općinskog vijeća, Općinskog načelnika i službi Općine, kao i općinskim uredima;
- u službenim prostorijama Općinskog vijeća, Općinskog načelnika i Općinskog pravobranilaštva;
- na zgradama ili ispred zgrada u kojima je sjedište mjesnih zajednica, javnih ustanova i preduzeća koje je osnovala Općina Tešanj;
- na centralnom spomenobilježju;
- manifestacijama prijateljstva i saradnje, te na javnim priredbama na kojima se predstavlja Općina.

#### **Član 8.**

Zastava Općine može biti istaknuta:

- na zgradi u kojoj predstavnici Općine primaju službenu posjetu domaćih i stranih državnika ili se u njoj održava neka druga svečanost od značaja za Općinu;
- u svečanim prilikama na službenom vozilima Općine i stubovima javne rasvjete;
- u drugim prigodnim slučajevima kada to odredi Općinski načelnik.

#### **Član 9.**

U danima žalosti na prostoru Općine Tešanj zastava se ističe na pola koplja, odnosno jarbola na zgradi Općine Tešanj, zgradi sjedišta javnih preduzeća i ustanova kojima je osnivač Općina, zgradi sjedišta mjesnih zajednica, drugim institucijama na području općine Tešanj, kao i na spomen centralnom spomenobilježju.

Odluku o proglašenju dana žalosti donosi Općinsko vijeće, Općinski načelnik ili drugi nadležni organ.

#### **Član 10.**

Grb i zastava Općine ne mogu se upotrebljavati na javnom mjestu ako su oštećeni ili na drugi način svojim izgledom narušavaju ugled Općine.

Oštećeni grb i zastava povlače se iz upotrebe.

### **Član 11.**

Upotreba grba Općine može se odobriti javnim preduzećima i ustanovama, kao i drugim pravnim osobama (udruženjima građana, fondacijama i dr.), ako su njihovi poslovi ili djelatnost od posebnog društvenog interesa za Općinu.

Uz zahtjev kojim se traži odobrenje za upotrebu grba mora biti priložen tehnički opis upotrebe grba (skica), naznačena svrha njegove upotrebe, te dokumenti koji se odnose na rad i djelatnost pravne osobe.

U odobrenju iz prethodnog stava može se odrediti rok njegove važnosti i ograničiti upotreba grba u određene svrhe.

Odluku o upotrebi grba Općine donosi Općinski načelnik.

### **Član 12.**

U provođenju projekata i održavanju događaja koje podržava ili finansira Općina, dozvoljeno je korištenje grba i naziva Općine Tešanj u promociji istih, a u skladu sa ovom Odlukom.

Slobodna je upotreba grba Općine u obrazovne svrhe, pod uslovom da ne narušava ugled i dostojanstvo Općine.

### **Član 13.**

Zabranjeno je:

- modifikovati grb Općine i pojedine elemente grba, te takve upotrebljavati;
- grb Općine postavljati na podloge kojima se narušava ugled Općine;
- koristiti grb Općine u suprotnosti sa Grafičkom knjigom standarda.

### **Član 14.**

Javne ustanove, preduzeća ili druge pravne osobe koje su upotrebljavale grb Općine do donošenja ove odluke, dužni su svoje radnje i postupke uskladiti sa ovom Odlukom, te podnijeti zahtjev za korištenje grba Općini Tešanj, najkasnije u roku 6 (šest) mjeseci od dana stupanja na snagu ove Odluke.

## **IV KAZNENE ODREDBE**

### **Član 14.**

Novčanom kaznom u iznosu od 50,00 do 300,00 KM kaznit će se svaka institucija ili osoba koja prekrši odredbe ove Odluke.

Postupak za naknadu štete i postupak odgovornosti pokrenut će se protiv svake osobe koja namjerno ošteti grb ili zastavu ili ih javno izloži na bilo koji način koji je u suprotnosti sa ovom Odlukom i koji negativno utiče na dostojanstvo i ugled Općine.

Prekršaje i druge postupke može pokrenuti nadležna općinska inspekcija i Općinsko pravobranilaštvo Općine Tešanj.

## **V ZAVRŠNE ODREDBE**

### **Član 16.**

Nadzor i kontrolu nad provođenjem ove odluke vrši Općinski načelnik i nadležne službe.

### **Član 17.**

Primjenom ove odluke prestaje primjena Odluke o grbu općine Tešanj (Službeni glasnik Općine Tešanj 2/97).

Ova odluka stupa na snagu danom objave u Službenom glasniku Općine Tešanj, a primjenjivat će se od 1.9.2016. godine.

**PREDSJEDAVAJUĆI VIJEĆA**  
**Senad N. Subašić dipl. ekonomista**

## OBRAZLOŽENJE

### PRAVNI OSNOV ZA DONOŠENJE

- član 7. i 14. Statuta Općine Tešanj ("Službeni glasnik Općine Tešanj" broj 11/07).

### RAZLOZI ZA DONOŠENJE

Ova oblast se obrađuje kroz različite propise, pa tako Odlukom o grbu se definiše izgled grba, Statutom Općine Tešanj određeno je postojanje grba i zastave Općine Tešanj, dok su Grafičkom knjigom standarda definisane pojedinosti vezane za izgled i grafička rješenja. Pored navedenog uočena je potreba da se jednom odlukom dodatno definiše izgled i upotreba grba i zastave Općine Tešanj.

Na grbu uz Stari grad kao kulturno nasljeđe općine Tešanj nalaze se vertikalne koje vizuelno dominiraju, rijeka Usora koja spaja dijelove grba i koja simbolizira život i vodne resurse, kao i knjiga koja simbolizira znanje.

Donošenje ove odluke naročito je važno radi standardizacije upotrebe grba i zastave Općine (format, boja, pozicija, svrha i slično) na štampanim i elektronskim materijalima.

Ovom odlukom se na jedinstven način definiše upotreba grba i zastave u Općini i institucijama Općine, što će rezultirati jednoobraznim načinom isticanja pripadnosti Općini Tešanj.

Prilog ove odluke su dijelovi Grafičke knjige standarda stranica 7., 8. i 9.

Predlažemo Općinskom vijeću usvajanje nacrtu Odluke, te provođenja javne rasprave u trajanju od 60 dana, nakon čega ćemo Vijeću ponuditi tekst prijedloga Odluke.

#### Dostaviti:

1. Naslovu
2. Arhivi

#### OBRADIVAČ

Služba za boračko-invalidsku  
zaštitu i opću upravu

Sabahudin Omerbašić, profesor

#### PREDLAGAČ

OPĆINSKI NAČELNIK

Mr.sc. Suad Huskić, profesor

**Broj: 02-02-1-1509/16**

**Datum: 1.7.2016. godine**